



Republika e Kosovës
Republika Kosovo-Republic of Kosovo
Kuvendi - Skupština - Assembly

Legjislatura VI

Seanca plenare e Kuvendit

SP-009

Prishtinë, më 5, 6, 7 dhe 10 dhjetor 2017

P R O C E S V E R B A L

**I SEANCËS PLENARE TË KUVENDIT TË REPUBLIKËS SË KOSOVËS,
E MBAJTUR MË 5, 6, 7 DHE 10 DHJETOR 2017**

Seancën e kryesoi Kadri Veseli, kryetar i Kuvendit, i ndihmuar nga nënkryetarët e Kuvendit: Xhavit Haliti, Aida Dërguti, Kujtim Shala dhe Mufera Shinik.

Kryetari i hapi punimet e seancës plenare sipas rendit të ditës të përgatitur nga Kryesia e Kuvendit, me pëlqimin e grupeve parlamentare, në mbledhjen e mbajtur më 29 nëntor 2017.

1. Shqyrtimi i parë i Projektligjit për Buxhetin e Republikës së Kosovës për vitin 2018

Kryetari i njoftoi deputetët e Kuvendit se Komisioni FunkSIONAL për Buxhet dhe Financa e e ka shqyrtuar projektligjin dhe Kuvendit i ka rekomanduar miratimin e tij.

Në fillim, në formë përmbledhëse Projektligjin për Buxhetin e Republikës së Kosovës për vitin 2018 e paraqiti kryeministri i Republikës së Kosovës, Ramush Haradinaj. Ai i ftoi deputetët e Kuvendit që ta miratojnë këtë projektligj. Diskutimi i plotë i kryeministrit është dhënë në transkript.

Pastaj, në mënyrë të detajuar Projektligjin për Buxhetin e Republikës së Kosovës për vitin 2018 e paraqiti ministri i financave, z. Bedri Hamza.

Ministri Bedri Hamza tha se Projektligji për Buxhetin e viti 2018 është hartuar nga Ministria e Financave me ndihmën e të gjitha institucioneve publike vendore dhe në konsultim të ngushtë me institucionet financiare ndërkombëtare që na mbështesin në këtë fushë, e në veçanti me Fondin Monetar Ndërkombëtar.

Nëpërmjet këtij buxheti jemi të bindur se kemi bërë më të mirën për një shpërndarje sa më të drejtë të parasë publike për financimin e prioritetëve tona reformuese që kanë kthim më të madh në të mirat materiale për qytetarët e vendit.

Objektiv kryesor që kemi pasur gjatë zhvillimit të këtij draft-buxheti është ruajtja dhe forcimi i mëtejshëm i stabilitetit fiskal të vendit. Me këtë buxhet ne sigurohemi se do të kemi rritje ekonomike stabile dhe qëndrueshme, që është bazë për zhvillimin e qëndrueshëm të buxhetit.

Projeksionet makroekonomike: Në vitin 2018 presim që rritja ekonomike e vendit, e matur përmes rritjes së bruto prodhimit vendor, të jetë 4,6% në terma realë, ndërsa në atë nominal rritja do të jetë mbi 6%. Kjo rritje e projektuar pritet të mbështetet mbi të gjitha nga niveli i rritur i investimeve, duke përfshirë edhe ato publike, konsumi dhe rritja e eksporteve të vendit.

Të hyrat: Projektionet mbi të hyrat e përgjithshme buxhetore në vitin 2018-2020 janë të ndërtuara mbi bazën e parashikimeve dhe zhvillimit të gjithmbarshëm ekonomik dhe efektet e këtij zhvillimi në bazën tatimore. Ne presim që në vitin 2018 total të hyrat buxhetore të jenë në një vlerë prej një miliard e 829 milionë eurosh, vlerë e cila është më e lartë se buxheti i vitit 2017 përreth 6%, apo nëse shprehem në miliona euro, 104 milionë më tepër.

Kjo rritje planifikohet të vazhdojë se rritja e të hyrave të përgjithshme vjen si rezultat i kontributit prej rreth 74% nga tatimet indirekte, pasuar me rreth 15% nga tatimet direkte dhe rreth 11% të hyra jotatimore.

Nga këndvështrimi i agjencive tatimbledhëse, me Propozim-buxhetin 2018 të hyrat nga ATK-ja parashihen të arrijnë në vlerën prej 446 milionë eurosh, që është një rritje prej rreth 5,4% në raport me buxhetin e vitit 2017.

Ndërsa të hyrat e mbledhura nga Doganat e Kosovës planifikojnë të arrijnë në një miliardë e 175 milionë euro, apo një rritje prej 6% në raport me vitin 2017.

Sa u përket të hyrave jotatimore, ato pritet që përafërsisht të mbesin në nivele të njëjta përgjatë periudhës afatmesme në një vlerë prej rreth 200 milionë eurosh.

Sa u përket të dalave buxhetore - Propozimi për shpenzime buxhetore është përpiluar mbi hapësirën që ofron planifikimi i të hyrave buxhetore dhe niveli ligjor i deficitit buxhetor. Kjo formë e buxhetimit shërben si garanci e disiplinës, e cila mundëson ruajtjen e stabilitetit makrofiskal.

Duke u nisur nga ky qëllim, Buxheti i propozuar është projektuar në tri parime:

Në përshtatjen e shpenzimeve rrjedhëse që punët të vazhdojnë të papenguara për ofrimin e shërbimeve publike dhe duke parandaluar akumulimin e pagesave të vonuara.

Në ofrimin e financimit shtesë për katër prioritet buxhetore të Qeverisë.

Në strukturimin e financimit të buxhetit për të dhënë shtytje ekonomisë nëpërmjet përfshirjes në qarkullim të brendshëm të fondeve nga jashtë nëpërmjet projekteve me rentabilitet të lartë ekonomik.

Gjithsej shpenzimet buxhetore janë rritur me 272 milionë euro, apo 15% në krahasim me buxhetin e vitit 2017, duke arritur shumën totale prej 2 miliardë e 82 milionë eurosh.

Në kuadër të shpenzimeve sipas kategorive ekonomike kemi këtë buxhet:

Shpenzimet për kategorinë “Paga dhe mëditjet” për vitin 2018 janë paraparë të jenë 589 milionë euro, një rritje prej 4,3% në raport me shpenzimet e parashikuara për paga dhe mëditje në buxhetin për vitin 2017.

Ky buxhet për paga dhe mëditje parasheh rritjen e pagave për të gjithë të punësuarit në sektorin publik nga 1 janari 2018.

Subvencionet dhe transferet priten të jenë në vlerë 525 milionë euro në vitin 2018, që është një rritje prej 6% në krahasim me buxhetin e vitit 2017.

Si pjesëmarrje në raport me bruto produktin vendor, subvencionet dhe transferet gjatë vitit 2018 priten të arrijnë në nivelin prej 7,9%, njëjtë sa ishin edhe në periudhën 2017 dhe 2016.

Në këtë buxhet pritet të financohen të gjitha skemat shoqërore, duke përfshirë financimin për kategoritë e dala nga lufta, rritjen e buxhetit për përfituesit e skemave sociale, financimin për trashëgimin e pensioneve kontributdhënëse dhe skema të tjera.

Nëpërmjet buxhetit për transfere sociale do të mbështeten edhe viktimat e dhunës seksuale nga lufta.

Për më tepër, nëpërmjet këtij buxheti parashihet edhe përkrahja e fermerëve me subvencione, për t’u siguruar se ky sektor vazhdon me ritmet e veta pozitive.

Vlera e shpenzimeve të planifikuara për “mallra dhe shërbime” në vitin 2018 arrin në 264 milionë euro, apo 7,9% rritje, në raport me Buxhetin 2017.

Shpenzimet kapitale për vitin 2018 planifikohet të rriten për 37% në raport me buxhetin për vitin 2017, duke arritur shumën prej 687 milionë eurosh.

Për më shumë, si pjesëmarrje e bruto produktit vendor, shpenzimet kapitale për vitin 2018 kanë shënuar rritje në 10,3%, nga 8% sa janë planifikuar me buxhetin e vitit 2017.

Pjesë e rëndësishme e investimeve kapitale mbeten projektet e autostradës Prishtinë-Shkup, autostrada Prishtinë-Gjilan, projekti i rrugës M2 për Mitrovicë, M3 për Pejë dhe rruga për Podujevë.

Përfundimi i ndërtimit të rrugës Skenderaj-Drenas e zgjerimi i rrugës Dollc-Gjakovë dhe qarkut të Gjakovës.

Dhe investime të tjera për përmirësimin e infrastrukturës lokale, sportive, arsimore dhe projekte, të cilat krahasuar me vitin e kaluar kanë shënuar një rritje të ndjeshme.

Qeveria e Kosovës e sheh bartës të zhvillimit ekonomik sektorin privat. Andaj, ne kemi përfshirë mbështetje të mëtutjeshme për fondin për garantimin e kredive, në mënyrë që ta rrisim qasjen e financave të të rinjve dhe posaçërisht të grave.

Bashkë me donatorë dhe me institucione financiare ndërkombëtare do të arrijmë që ta rrisim në sasi të konsiderueshme kapitalin dhe sektorët, të cilët do të mbulohen nga fondi për garantimin e kredive.

Buxheti për nivelet komunale.

Shpenzimet për financimin e buxhetit komunal kanë arritur shumën prej 491,2 milionë eurosh, duke dhënë mbështetje të rëndësishëm për ofrimin më kualitativ të shërbimeve komunale si dhe zhvillimit ekonomik lokal.

Sa i përket burimit të financimit, kemi këtë strukturë. Rritja e grantit të përgjithshëm prej 30 milionë eurosh në krahasim me vitin 2017, duke shkuar në 179,4 milionë euro.

Buxheti komunal është rritur po ashtu edhe me tre milionë euro nga rritja e planifikuar e të hyrave vetjake dhe 3,3 milionë euro nga projektet e huamarrjes për shëndetësi dhe arsim.

Deficiti buxhetor dhe borxhi publik: Deficiti i përgjithshëm buxhetor për vitin 2018 pritet të jetë 112 milionë euro, apo rreth 1,7% e bruto produktit vendor, për të vazhduar me në ritëm të zvogëluar deri në 1% në vitin 2020. Natyrisht se kur këtij deficiti i shtojmë edhe financimin nëpërmjet klauzolës për investime dhe nga mjetet e AKP-së, kemi një rritje të tij, por ekzekutimi i projekteve të parapara nëpërmjet këtij financimi do të bëhet vetëm pas marrjes së këtyre mjeteve. Ne parashohim një deficit të qëndrueshëm dhe me financim adekuat. Ky nivel i deficitit pritet të financohet me një kombinim të huamarrjes së brendshme dhe të jashtme. Diskutimi i plotë i ministrit është dhënë në transkript.

Pas paraqitjes së projektligjit për buxhetin e vitit 2018, kryetari e hapi debatin.

Lidhur me Projektligjin për Buxhetin e Republikës së Kosovës për vitin 2018 diskutuan: në emër të Komisionit Funksional, Lumir Abdixhiku; në emër të GP të LVV-së, Visar Ymeri; në emër të GP të LDK-së, Avdullah Hoti; në emër të GP të PDK-së, Safete Hadërgjonaj; në emër të GP të LS-së, Jelena Bontiq; në emër të GP të AAK-së, Blerim Kuçi; në emër të GP “Nisma për Kosovën”, Enver Hoti; në emër të GP “6+”, Fikrim Damka dhe deputetët: Albulena Haxhiu, Flora Brovina, Bekë Berisha, Milaim Zeka, Duda Balje, Sami Kurteshi, Naser Osmani, Bekim Haxhiu, Xhevahire Izmaku, Rasim Selmanaj, Islam Pacolli, Driton Çausi, Mimoza Kusari-Lila, Mexhide Mjaku-Topalli, Teuta Haxhiu, Besa Baftiu, ministri Abelard Tahiri, Naser Rugova, Nezir Çoçaj, Time Kadriaj, Bilall Sherifi, Rexhep Selimi, Armend Zemaj, Memli Krasniqi, Shkumbim Demaliaj, Ismajl Kurteshi, Besa Gaxheri, Sala Berisha-Shala, Ahmet Isufi, Shqipe Pantina, Mirjeta Kalludra, Hajdar Beqa, Emilija Rexhepi, Liburn Aliu dhe Vjosa Osmani, diskutimet e të cilëve janë dhënë në transkript.

Kryeministri i Kosovës, Ramush Haradinaj dhe ministri i financave, Bedri Hamza gjatë gjithë diskutimeve dhanë shpjegime të hollësishme për çështjet që i ngritën deputetët gjatë diskutimeve të tyre në lidhje me Projektligjin për Buxhetin e Republikës së Kosovës për vitin 2018.

Kryesuesi, me pëlqimin e grupeve parlamentare, i ndërpreu punimet e seancës plenare në orën 18:50, për të vazhduar të nesër, më 6 dhjetor 2017, prej orës 10:00.

* * *

E mërkurë, më 6 dhjetor 2017, në orën 10:00

Vazhdimi i seancës plenare, e filluar më 5 dhjetor 2017

Kryetari i procedoi me diskutimet për shqyrtimin e Projektligjit për Buxhetin e Republikës së Kosovës për vitin 2018.

Lidhur me Projektligjin për Buxhetin e Republikës së Kosovës për vitin 2018, vazhduan me diskutime edhe këta deputetë: Arbër Rexhaj, Lirije Kajtazi, Faton Topalli, Evgjëni Thaçi-Drăgusha, Saranda Bogujevci, Driton Selmanaj, Mërgim Lushtaku, Drita Millaku, Hykmete Bajrami, Abdyl Salihu, Arbërie Nagavci, Fidan Rekaliu, Valentina Bunjaku-Rexhepi, Andin Hoti, Salih Salihu, Haxhi Abdyli, Luljeta Gutaj-Veselaj, Ilir Deda, Dardan Molliqaj, Ganimete Musliu, Haxhi Shala, Valon Ramadani, Lutfi Zharku, Veton Berisha, Imet Rrahmani, Blerta Deliu-Kodra, Zafir Berisha, Qëndron Kastrati, Danush Ademi, Nait Hasani, Gani Dreshaj, Kujtim Shala, dhe ministri Besim Beqaj,

Kryetari, pas diskutimeve, e hodhi në votim miratimin në parim të projektligjit.

Kryetari konstatoi se nuk kishte kuorum të mjaftueshëm për vendimmarrje meqë në votim morën pjesë vetëm 60 deputetë.

Në vazhdim, kryetari procedoi me pikat tjera të rendit të ditës.

2. Shqyrtimi i Projektligjit për ratifikimin e Marrëveshjes financiare për projektin e konkurrueshmërisë dhe gatishmërisë për eksport ndërmjet Republikës së Kosovës dhe Asociacionit Ndërkombëtar për Zhvillim

Kryetari i njoftoi deputetët se Komisioni FunkSIONAL për Buxhet dhe Financa e ka shqyrtuar projektligjin dhe Kuvendit i rekomandon miratimin e tij.

Kryetari i Komisionit FunkSIONAL për Buxhet dhe Financa, Lumir Abdixhiku, e paraqiti dhe e arsyetoi raportin e komisionit.

Për këtë projektligj diskutuan: në emër të GP të LVV-së, Glauk Konjufca; në emër të GP të LDK-së, Lumir Abdixhiku; në emër të GP të PDK-së, Safete Hadërgjonaj; në emër të GP të AAK-së, Ahmet Isufi; në emër të GP “Nisma për Kosovën”, Enver Hoti, Hykmet Bajrami, Mimoza Kusari-Lila, Milaim Zeka dhe Bilall Sherifi, diskutimet e të cilëve janë dhënë në transkript.

Pas këtyre diskutimeve, kryetari e hodhi në votim projektligjin

Rezultati i votimit ishte, si në vijim:

Për -----	83,
Kundër -----	0,
Abstenime -----	0.

Kuvendi me shumicë votash mori këtë:

V E N D I M

Miratohet Ligji nr. 06/L-017 për ratifikimin e Marrëveshjes financiare për projektin e konkurrueshmërisë dhe gatishmërisë për eksport ndërmjet Republikës së Kosovës dhe Asociacionit Ndërkombëtar për Zhvillim.

3. Shqyrtimi i Projektligjit për ratifikimin e Marrëveshjes financiare për financim shtesë për Projektin për bujqësi dhe zhvillim rural ndërmjet Republikës së Kosovës dhe Asociacionit Ndërkombëtar për Zhvillim

Kryetari i njoftoi deputetët se Komisioni FunkSIONAL për Buxhet dhe Financa e ka shqyrtuar projektligjin dhe Kuvendit i rekomandon miratimin e tij.

Ministri i Financave, z. Bedri Hamza, para deputetëve të Kuvendit e paraqiti dhe e arsyetoi përmbajtjen dhe strukturën e projektligjit. Ai i ftoi deputetët që ta miratojnë këtë projektligj.

Kryetari i Komisionit FunkSIONAL për Buxhet dhe Financa, Lumir Abdixhiku, e paraqiti dhe e arsyetoi raportin e komisionit.

Për këtë projektligj diskutuan: në emër të GP të LVV-së, Glauk Konjufca; në emër të GP të LDK-së, Avdullah Hoti; në emër të GP të PDK-së, Mërgim Lushtaku; në emër të GP të AAK-së, Ahmet Isufi; në emër të GP Nisma për Kosovën, Bilall Sherifi, Islam Pacolli dhe Teuta Haxhiu, diskutimet e të cilëve janë dhënë në transkript.

Pas këtyre diskutimeve, kryetari e hodhi në votim projektligjin

Rezultati i votimit ishte, si në vijim:

Për -----	84,
Kundër -----	0,
Abstenime -----	0.

Kuvendi me shumicë votash mori këtë:

V E N D I M

Miratohet Ligji nr. 06/L-018 për ratifikimin e Marrëveshjes financiare për financim shtesë për Projektin për bujqësi dhe zhvillim rural ndërmjet Republikës së Kosovës dhe Asociacionit Ndërkombëtar për Zhvillim.

4. Shqyrtimi i parë i Projektligjit mbi masat doganore për mbrojtjen e të drejtave të pronësisë intelektuale

Kryetari i njoftoi deputetët se Komisioni FunkSIONAL për Buxhet dhe Financa e ka shqyrtuar projektligjin dhe Kuvendit i rekomandon miratimin e tij.

Ministri i Financave, z. Bedri Hamza, para deputetëve të Kuvendit e paraqiti dhe e arsyetoi përmbajtjen dhe strukturën e projektligjit. Ai i ftoi deputetët që ta miratojnë këtë projektligj.

Kryetari i Komisionit FunkSIONAL për Buxhet dhe Financa, Lumir Abdixhiku, e paraqiti dhe e arsyetoi raportin e komisionit.

Për këtë projektligj diskutuan: në emër të GP të LVV-së, Glauk Konjufca; në emër të GP të LDK-së, Avdullah Hoti; në emër të GP të PDK-së, Mërgim Lushtaku; në emër të GP të AAK-së, Ahmet Isufi; në emër të GP Nisma për Kosovë, Enver Hoti, Milaim Zeka dhe Kujtim Shala, diskutimet e të cilëve janë dhënë në transkript.

Pas këtyre diskutimeve, kryetari e hodhi në votim projektligjin.

Rezultati i votimit ishte, si në vijim:

Për -----	80,
Kundër -----	0,
Abstenime -----	0.

Kuvendi me shumicë votash mori këtë:

V E N D I M

1. Miratohet në parim Projektligji nr. 06/L-015 mbi masat doganore për mbrojtjen e të drejtave të pronësisë intelektuale.
2. Ngarkohen Komisioni Funkcional dhe komisionet e përhershme që në afatin e paraparë me Rregulloren e Kuvendit ta shqyrtojnë projektligjin dhe Kuvendit t'ia paraqesin raportet me rekomandime.

* * *

Në vazhdim, kryetari e hodhi në votim propozimin e GP të Listës serbe për zëvendësimin e deputetëve nga ky Grup Parlamentar në Komisionin për Legjislacion, Mandate, Imunitete, Rregulloren e Kuvendit dhe Mbikëqyrjen e Agjencisë Kundër Korrupsionit.

Kuvendi, me shumicë votash, mori këtë:

V E N D I M

Deputeti Igor Simiq emërohet anëtar në Komisionin për Legjislacion, Mandate, Imunitete, Rregulloren e Kuvendit dhe Mbikëqyrjen e Agjencisë Kundër Korrupsionit, në vend të deputetes Jelena Bontiq.

Kryetari i ndërpreu punimet e seancës së sotme në orën 17:15.

E enjte, më 7 dhjetor 2017, në orën 10:00

Vazhdimi i seancës plenare, e filluar më 5 dhjetor 2017

Kryetari kërkoi deklarinë e përfaqësuesve të grupeve parlamentare lidhur me pjesëmarrjen në procesin e votimit të Projektligjit për buxhetin e Republikës së Kosovës për vitin 2018.

Lidhur me Projektligjin për Buxhetin e Republikës së Kosovës për vitin 2018 diskutuan: në emër të GP të LVV-së, Glauk Konjufca; në emër të GP të LDK-së, Avdullah Hoti; në emër të GP të PDK-së, Elmi Reçica; në emër të GP të LS-së, Sasha Milosavljeviq; në emër të GP të AAK-së, Ahmet Isufi; në emër të GP “Nisma për Kosovën”, Bilall Sherifi; në emër të GP “6+”, Allbert Kinolli, Armend Zemaj, Hykmete Bajrami, Islam Pacolli, Milaim Zeka, Teuta Haxhiu, Rexhep Selimi, Arben Gashi dhe Kujtim Shala, diskutimet e të cilëve janë dhënë në transkript.

Pas këtyre diskutimeve, kryetari vendosi që seanca plenare për votimin e Projektligjit për Buxhetin e Republikës së Kosovës për vitin 2018, do të vazhdojë të dielën, më 10.12.2017, në orën 15:00.

* * *

E diel, më 10 dhjetor 2017, në orën 15:00

Vazhdimi i seancës plenare, e filluar më 5 dhjetor 2017

Në fillim të seancës, Kuvendi, me propozimin e deputetit Abdyl Saliu, mbajti një minutë heshtje me rastin e vdekjes së aktorit Blerim Peci.

Deputeti Sami Kurteshi mbajti një fjalim me rastin e Ditës Ndërkombëtare për të Drejtat e Njeriut. Diskutimi i tij është dhënë i plotë në transkript.

Pastaj, kryetari procedoi me votimin në parim të Projektligjit për Buxhetin e Republikës së Kosovës për vitin 2018.

Rezultati i votimit ishte, si në vijim:

Për -----	62,
Kundër -----	2,
Abstenime -----	0.

Kuvendi me shumicë votash mori këtë:

V E N D I M

1. Miratohet në parim Projektligji nr. 06/L-020 për Buxhetin e Republikës së Kosovës për vitin 2018.
2. Ngarkohen Komisioni Funkcional dhe komisionet e përhershme që në afatin e paraparë me Rregulloren e Kuvendit ta shqyrtojnë projektligjin dhe Kuvendit t'ia paraqesin raportet me rekomandime.

Kryetari i mbylli punimet e seancës plenare më 10 dhjetor 2017, në orën 15:20 minuta.

Kryetari i Kuvendit:

Kadri VESELI

Procesverbalin e hartoi:

Drejtorja për Çështje Plenare dhe Procedurale